



22. juni 2013

UKA 2013/61

Inatsisartut Suleriaasianni § 33 naapertorlugu aalajangiiffigisassatut siunnersuut imaat-toq matumuuna saqqummiuppara:

Innuttaasut imigassamik ajornartorsiutillit taassuminngalu qaangiiniarlutik katsorsartikkumasut nammineq akiliinatik katsorsartittarnissaannik aqquitsiuussinissamik iliussissanullu pilersaarummik kingusinnerpaamik Inatsisartut 2014-imi upernaakkut ataatsimiinnissaannut saqqummiunneqartussamik Naalakkersuisut peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortaq Mimi Karlsen, Inuit Ataqatigiit)

Tungavilersuut

Nunatsinni imigassap ajornartorsiutaanera maanna ukiorpassuarni qaangerniarlugu assigiinngitsunik iliuseqartoqartarsimavoq. Tamatuma kingunerisaanik imigassamik atuineq Nunatsinni milliartorpoq, tamanut iluaqutaasussamik.

Nalunngilarput inuk ataaseq imigassamik ajornartorsiuteqaraangat ilaqutariinnut tamanut, inuiaqatigiinnullumi tamanut sunniuttartoq. Sunniutaasullu ajornartorsiutit kinguaariinnut ingerlaqqissinnaasartut nalunngilarput.

Inuup ataatsip, ilaqutariilluunniit imigassamik pinngitsuuisinnaajunnaarnermik nappaateqarnerisigut sorpassuit sunnerneqartarput. Ilaqutariit napatitsisussamik amigaateqalersarput, suliffeqarfiit sulisuminnik annaasaqartarput aammalu meeqqat toqqissisimanissaraluinik piiaasoqartarluni.

Imigassamilli atornerluinerup kinguaariinni ingerlaqqissinnaasarnera aamma takussutissarpassuaqarpoq, tamannalu inuiaqatigiit ataatsimoorluta kipitinniartariaqarparput kinguaagut imigassap nanertuutaanik kingornusisinnianngikkutsigit.

Maannakkut imigassamik ajornartorsiuteqartoq katsorsartinnissaminut qinnuteqarsinnaavoq. Ilaatigut periarfissaqarpoq akileeqataanngikkaluarluni katsorsartittoqarsinnaalluni. Tamannali inunnut ikippallaanut atuuppoq, tassa amerlasuut imerunnaarnissaminut katsorsartinniarunik namminneq akiliisariaqartarmata, imaluunniit kingusinnerusukkut akilersuisinneqarsinnaasarmata.

Inuiaqatigiinnili imigassap kinguaariinnut ajornartorsiutaanerata ingerlaqqinnginnissaa qulakkeerniarutsigu annertunerusumik iliuseqartariaqarpugut, tassalu inuk akissamik isumakuluuteqarani katsorsartinnissamik qinnuteqarsinnaasariaqarnera.

Inuiaqatigiinnut akisoqqaassaaq, ukiulli arlaqanngitsut imminut akilissaaq, ilaqutariit ajornartorsiutiminnit aniguippata, sulisinnaasut amerlippata il.il.

Aningaasaliisinnaanermik periarfissatut isigaara Namminersorlutik Oqartussat, kommunit suliffeqarfiillu ataatsimoorlutik akileeqataanerisigut tamanna anguneqarsinnaasoq.

Naalackersuisut suliasinneqassapput kommunit suliffeqarfiillu suleqatiserissagaat aningaasaleeqatigiinnermikkut inuit katsorsartinniartut akiliinatik katsorsartinnissaannik pilersitsissallutik.

Inuit Ataqtigiinni neriuppugut amerlanerussuteqarluartut siunnersuut ilalerumaaraat.

Pisortanut aningaasaqarnikkut allaffissornikkullu kingunissai.

Suliniutissat pilersarusiornerat aningaasartuutitaqassaaq. Naatsorsuutigineqanngilarli aningaasartuutit ukiumoortumik AC-mut aningaasartuutaasartut sinnerumaarai. Aningaasat Ilaqutariinnermut Naalackersuisoqarfiup aammalu Peqqissutsimut Naalackersuisoqarfiup massakkut missingersuutaanni nassaarineqassapput, suliaq taakku Naalackersuisoqarfiit suleqatigiillutik suliarisussaammassuk.

Taamatuttaaqq kommunit, avitseqatigiittoqassappat, aningaasartuutajumaarpoq.

Namminersorlutik inuussutissarsiortunut aningaasaqarnikkut allaffissornikkullu kingunissai.

Avitseqatigiittoqassappat namminersorlutik inuussutissarsiortunut aningaasaqarnikkut allaffissornikkullu sunniuteqassaaq.

Innuttaasunut aningaasaqarnikkut allaffissornikkullu kingunissai.

Soqanngilq.